

Naqqiut

Taarserpaa saqqummiussissut 17. august 2022-meersoq
(Kalaallisuuani oqaatsinik allannguisoqarnera pillugu)

**Uunga siunnersuut: Eqqumiitsuliornermik ingerlatsineq pillugu Inatsisartut
inatsisaannut allannguutissatut siunnersuut**
(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Saqqummiussissut

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Eqqumiitsuliornermik ingerlatsineq pillugu Inatsisartut inatsisaannik allannguineq pillugu
Inatsisartut inatsisisaattut siunnersuut matumuuna Naalakkersuisut sinnerlugit
saqqummiuppara.

Siunnersuutikkut eqqumiitsuliortunut pinngorartitsisunut ataqqinaatissiisummik
tunniussisarneq kiisalu eqqumiitsuliortunik akissarsisitsisarneq eqqunneqassaaq.
Eqqumiitsuliortut tapersorsornissaat Naalakkersuisunit pingartipparput siunnersuullu
tassunga takutitsinertut isigineqassalluni.

2019-imi ukiukkut ataatsimiinnermi Naalakkersuisut eqqumiitsuliorneq pillugu inatsimmik
allannguutissamik siunnersuuteqarput, taamaalilluni eqqumiitsuliorneq pillugu
aninkaasaateqarfimmik pilersitsinissamik inatsisitigut sinaakkusiisoqarluni, kiisalu
eqqumiitsuliornermut tapiissutinik tunniussisarnermut tunngatillugu tassunga
attuumassuteqannginnissaq pilersinneqarluni. 2021-milu Kalaallit Nunaanni
eqqumiitsuliorneq pillugu aninkaasaateqarfik siulleq pilersinneqarpoq.

Inatsisisatut siunnersuummik 2019-imi suliarinninnermut atatillugu Inatsisartunut ilaasortatut
oqaaseqartartuuninni eqqaavara ataqqinaatissiisummik tunniussisarnissamut
piffissangortoq, taamaaliornitsigut eqqumiitsuliortut immikkularissunik suliaqarsimasut
ataqqiniassagatsigit. Taamani Naalakkersuisuusimasut eqqumiitsuliorneq pillugu inatsimmik
allannguisoqqaartariaqartoq akissutigaat.

Taamaammat Naalakkersuisut saqqummiuppaat eqqumiitsuliorneq pillugu inatsimmut
allannguutissatut siunnersuut, taamaalilluni eqqumiitsuliortut pinngorartitsisullu
ataqqinaatissiisummik tunniuttakkat inatsisitigut tungavissinneqassallutik.
Eqqumiitsuliortunut pinngorartitsisunut eqqumiitsuliornermik suliaqartuni pingaruteqartutut
inissisimasunut ataqqinaatissiisummik tunniunneqartartunik tunniussisarnissamik
siunnersuut atuutsitsilissaq.

Siunnersuut malillugu ataqqinaammik tunniuttakkat eqqumiitsuliortunut sisamanut ukiunut
qulikkaartumik tunniussisoqartassaaq. Tunniuttakkat siunnersuummi ukiumut inummut
ataatsimut 250.000 kr.-inut siunnersuummi aalajangiunneqarput. Ataqqinaammik
tunniuttakkani siunertarineqarpoq eqqumiitsuliortut ataasiakkaat ataqqiniarneqarnissaat.

Taakku saniatigut Naalakkersuisut eqqumiitsuliortunut akissarsisitsinissamut aamma inatsisitigut tunngavissiisoqarpoq.

Siunnersuummik piareersaanerup nalaani Ilanniartitaanermut, Kultureqarnermut, Timersornermut Ilageeqarnermullu Naalakkersuisoqarfik Eqqumiitsuliornikkut Pilersitsisut Ingerlatsisullu kattuffiani EPI-mi siulersuisut ataatsimeeqatigaat, taakkulu eqqumiitsuliortut sinnerlugit siunnersuut tapersorsorlugu. Tunniuttakkat eqqumiitsuliornermut suliniutinut aamma sulinermut aningaasaliinernut atugassanut tapiissutaareersunit eqqumiitsuliornermullu aningasaateqarfimmit aqunneqartunit aningaasalersorneqannginnissaat taakkununnga pingaaruteqarsimavoq. Tamanna Naalakkersuisunit tusaaniarneqarsimavoq taamaammallu 2023-mut aningaasanut inatsisissamut siunnersummi ataqqinaatissiisummik tunniuttakkanut immikkut aningaasaliinissaq pingaartissimallugu.

Taamatut oqaaseqarlunga siunnersuut Inatsisartunut akuersaallaqqullugu oqallisigisassanngortippara.